



Prolog Blagette 2021

Motto: „Zämme heebe – zämme stoo“

Das Virus, s'isch us China importiert
Het uns im Griff, ganz unscheniert
Unsere Alldaag mien mir bös ischrängge
Das git uns allne scho lang z'Dängge

Massgepflicht heisst's sapperlot
Uffghoobe isch s'Vermummigs-Verbot
Unser Zämmelääbe isch ins Wangge choo
Do drüber sin mir gar nit froo

Geischterspiil ooni Fan, ooni Gschrei
Bim Schutte wie bim Ishockey
S'Vereinslääbe muesch an Nagel hängge
An Volgsfeschter dörfesch gar nit dängge

Ä Meeter fuffzig Abstand halte
Gilt für Jungi und au für Alti
Heimoffice söll mä betriibe
Und nur in dr Woonig bliibe
Die ganzi Wält stoot uf em Chopf
Do chunsch dr vor als arme Tropf

Au d'Fasnacht isch vo däm Schiggsaal troffe
Das losst uns alli nur no hoffe
Dass mir d'Fasnachtsdääg, s'isch unser Beschträäbe
Weenigschtens no virusfrei chönne überlääbe
D'Händ wäsche, Massge draage
Suscht goots dr gsundheitlich an Chraage

Do seit ä Binggis zu sim Babbe:
„Mir hänn ä coronafreis Gmeiniwappe
Dr goldig Schlüssel und aus s'Schwäart
Wärde desinfiziert, die sin uns das wäärt.“
Und dr zweit Blagettewaggis, wo sich duet präsentiere
Söll die dissjööri Allschwiler Fasnacht symbolisiere

S'git kei Morgestreich, kei Guggeschränze
Kei Umzug wo dä chasch mit Sujet glänze
Kei Chinderfasnacht, s'isch zum Hüüle
Als hilflose Fasnächtler duesch di füüle

D'Blagette will zum Ussdrugg bringe
Keini Fasnachtstöön dien in däm Joor erklinge
Trotzdämm: „Zämme heebe – zämme stoo“, es blibt drbi
Das söll s'Motto vo dr Schwellemer Fasnacht 2021 si

Und so dien mir zum Gedängge
Alli Cliquefääne usehängge
Au d'Fasnachtsfigure an dä Riigelmuure
Löön unsere Fasnachtsgeischt nit versuure
Trotz Corona, joo es isch ä soo
Söll d'Fasnacht au im 2021 uferstoo

d'Chrutstorze
Wildviertel-Clique Allschwil